

聖

武

記

聖武記卷四

邵陽魏源撰

乾隆蕩平準部記

準部自噶爾丹以後三世皆梟雄能用其衆至乾隆十年噶爾丹策零死而所部遂亂初策零有三子次子那木札爾以母貴嗣汗位童昏無行恣睢狂惑其同母女兄恆戒之稍長遂以讒幽其女兄多戮宰桑於是其女兄之夫薩音伯勒克與諸台吉攻殪之立其庶兄刺麻達爾札而大小策零兩部裔則謀擁立其弟策妄達什故策妄達什爲刺麻達爾札所害各部復疑懼大小二

策零者皆名敦多卜準夷同族台吉以謀勇爲策妄父子兩世將兵西破衛藏東摧蒙古者也故大策零之孫達瓦齊與小策零之子達什達瓦等皆爲國人所嚮亦皆爲刺麻達爾札所忌俄達什達瓦復被翦鋤於是達瓦齊與其黨阿睦爾撒納奔哈薩克阿睦爾撒納者故拉藏汗之孫丹衷之子而策妄那布坦之外孫也丹衷妻策妄之女先生子班珠爾而丹衷被戮復有遺腹改適輝特部酋生阿睦撒納長而狼戾陰狙見準部內亂欲搆使自誣而已乘其釁初謀擁立策妄達什不遂復挾達瓦齊以逞刺麻達爾札遣台吉將兵三萬搜討二人

于哈薩克期必獲以除後患阿睦撒納遁回舊游牧地
潛簡精銳千有五百由闊勒奇山路襲殺刺麻達爾札以已和
入伊犁誘其腹心爲內應遂襲殺刺麻達爾札以已和
碩特種國人未附乃推立達瓦齊爲汗達瓦齊族貴而
無能旋爲小策零之孫濟噶爾所攻敗兩酋爭立各徵
兵于諸部諸部落莫知適從國中大亂阿睦撒納復爲
誘除濟噶爾而還達瓦齊于伊犁恃功益驕桀初四衛
拉兵伊犁最強阿睦薩納時爲輝特台吉居雅爾雅爾即塔爾巴哈臺者蒙古語多水獺也在伊犁東北一千九百里其同
母兄班珠爾爲和碩特台吉居庫爾烏蘇又取都爾伯

特台吉達什之女乃襲殺達什脅降其子納默庫而自

遷帳於額爾齊斯河

額爾齊斯河者回語遁紫之謂言其河水湍溜駛急也在阿爾泰山

之南二百里科布多之西三百餘里在雅爾之東阿睦

烏魯木齊之北各八百餘里平定後爲屯田之所阿睦

爾撒納令行三部遂侵掠伊犁邊境二人復大隙達瓦

齊三遣兵討之皆不克乃自領精兵三萬壓額爾齊斯

河又使其驍將瑪木特將烏梁海兵八千東西夾攻阿

睦撒納不能抗遂與納默庫班珠爾二台吉共率所部

兵二千口二萬東奔斂關內附時乾隆十九年秋也初

達什達瓦之死其宰桑薩喇爾等率千戶來降達瓦齊

之篡其杜爾伯特台吉三車梭等率三千戶來降

上詢悉其內亂先封降人卹部衆並調西北二路士馬屯邊而阿睦撒納復率輝特和碩特杜爾伯特三部至上久知其爲部衆所畏服可驅策嚮導且天時人事輻輳宜乘機大舉雪兩朝之憤詢謀于廷羣疑繇繇懲雍正九年博克托嶺之敗以深入爲險惟大學士傅恒主用間出征與上意合尙書舒赫德及定邊左副將軍策楞奉命收降輒請留其頭目於烏里雅蘇臺軍營而部落悉內徙使不得聚而生變上斥其猜

貳嚴譴之以尙書班第往代俾暫游牧於喀爾喀之札

卜堪河

札卜堪河受烏里雅蘇河之水西流至科布多境入于泊一作札卜噶

阿睦爾撒

納入覲熱河備言伊犁可取狀

上大喜封親王其

二台吉皆郡王旣而準部驍將瑪木特見諸台吉相踵
內附必召大兵知準噶爾事不可爲達瓦齊不可輔亦
脫身來歸于是準部爪牙心腹盡至且指畫準部形勢
如在目睫定議明秋大舉直擣伊犁阿睦撒納及瑪木
特以爲塞外秋獮時我馬肥彼馬亦肥不如春月乘其
未備且不能遠遁可一戰禽之無後患又準部東境以
額爾齊斯河與中國爲界本杜爾伯特原屯地近接阿
爾泰山可屯田備餉

杜爾伯特衆兼耕牧非準噶爾專事游牧者比故策妄父子入寇時

其兵皆屯額爾齊斯二河以其可就餉且與科布多阿爾泰近也

宜先遣兵萬人據形

勢而大兵二萬整隊繼進

上從之二十年二月兩

路出師班第爲定北將軍出北路阿睦爾撒納副之額

駙科爾沁親王色布騰郡王成袞雜布內大臣瑪木特

爲參贊永常爲定西將軍出西路薩賴爾副之郡王班

珠爾貝勒札拉豐阿內大臣鄂容安爲參贊兩副將軍

各領前鋒三千先進將軍參贊繼之降人三車梭納默

庫等皆以所部兵從兩路軍各二萬五千馬七萬匹西

路出巴里坤北路出烏里雅蘇臺各攜兩月糧約會於

博羅塔拉河博羅塔拉河在伊犁東北三百里爲南北

逆叛後卽踞此兩路會合之區山川水草形勢皆勝故阿

聖武記

四

四

進各部落望風崩角其同族大台吉噶爾藏多爾濟及
舊回酋和卓木先後迎降于是所至台吉宰桑或數百
戶或千餘戶攜餽酪獻羊馬繹絡道左師行數千里無
一人抗顏行者瀚海舊少雨至是則大雷雨以五月朔
長驅至博羅塔拉河距伊犁三百餘里兩軍皆會達瓦
齊素縱酒不設備至是倉卒急遣親信兩宰桑出令箭
徵兵而自率宿衛親兵萬人走保伊犁西北百八十里
之格登山阻渚爲營我師遮獲其徵兵之宰桑具悉國
中解體狀士氣倍奮爭渡伊犁河長驅追襲將及格登
山夜遣降夷阿玉錫等率二十餘騎往覘道路阿玉錫

卽乘夜突搗其營拍馬橫矛塞纛大呼賊瓦解達瓦齊以二千餘人宵遁餘皆不戰降黎明我三十餘騎遂收其衆七千餘還大營達瓦齊踰冰嶺南走回疆其下半途逃散僅餘百騎以烏什城阿奇伯木克霍吉斯爲已所善投之而霍吉斯已承我將軍檄卽執之以獻并獲前青海叛賊羅卜藏丹津獻俘京師

上御午門樓

受之皆赦其死論功行賞首獎大學士傅恒襄贊之功再加封一等公固辭不受班第封一等誠勇公薩賴爾一等超勇公而阿睦撒納晉封雙親王食親王雙俸其後達瓦齊霍吉斯亦皆賜封親王郡王入旗籍又釋故

回首大小和卓兄弟在伊犁者使歸舊部於是天山南北二路皆不血刃而定初四衛拉之分部也綽羅斯治伊犁和碩特治烏魯木齊和碩特自固始汗東徙青海後其烏魯木齊舊地遂爲準噶爾諸台吉公牧之所都爾伯特治額爾齊斯土爾扈特治雅爾

土爾扈特北去輝特治之部各有汗非有君臣之分也自綽羅斯渾台吉汗強盛伊犁始爲四部盟長抗衡中國者數世上欲俟事定仍衆建而分其力而阿睦

撒納志未厭必欲爲四部總台吉專制西域特欲出自

朝命則無後患乃自昵于額駙科爾沁親王使與

班第爲難而以已情託其歸奏時班第鄂容安留伊犁

籌善後阿睦爾撒納輒隱以總汗自處擅誅殺擄掠擅
調兵不服賜衣翎頂不用副將軍印自用渾台吉菊形
篆印移檄各部落諱其降言統領滿漢蒙古兵來平此
地又陰使哈薩克布魯特流言非已總四部邊不得安
與其黨曉夜聚謀詭秘叵測將軍參贊先後密以聞前
有 旨令阿睦爾撒納九月至熱河行飲至禮同四
部台吉受封而阿睦撒納前與額駙約期七月下旬俟
命額駙歸不敢奏至期無信而入覲期迫班第乃趣之
行令喀爾喀親王額林沁多爾濟與之俱旋奉 旨
以阿睦爾撒納逆形已著宜乘其未發誅之如已入朝

可追及則追誅之時阿睦撒納已就道且有哈薩克貢使隨行班第恐哈薩克驚疑遂不敢發阿睦爾撒納中途遷延及八月中旬尙無信疑事且中變十九日行至烏隆古河距其札布堪河舊游牧不遠乃詭言暫歸治裝以副將軍印交額林沁使先行有降夷首其謀額林沁不信竟縱之去由額爾齊斯河間道北逸遣使迎其孥於札布堪河則上已密諭烏里雅蘇臺軍營并其弟班珠爾收之不半日而賊使果至得不遣賊四出煽亂伊犁諸刺麻宰桑劫掠軍臺蠡起應之時大兵已徹僅五百兵留伊犁歸路斷又厄魯特與賊不合者賊

皆先以計遣入朝所留皆其黨羽班第鄂容安等力戰走二百餘里被圍死之時阿逆黨羽不過二千餘屯博羅塔拉河各部皆不敢從副將軍薩喇爾陷賊中復潛約宰桑刺麻與戰而將軍永常西路勁兵數千屯烏魯木齊附近台吉宰桑數千咸投赴使驅策用之兼程進剿立可撲滅永常反疑拒退卻自木壘南退軍巴里坤并移軍糧於哈密故北路無聲援賊益猖獗上乃以先後敕除阿逆密旨及班第等狐疑之章奏宣示中外黜額駙親王爵赴軍效力賜額林沁自盡逮永常治罪以策楞代之玉保富德達爾黨阿爲參贊兩路遄進

討賊明年正月大兵長驅至特克勒河探知阿逆僅距

一程

以下皆稱阿逆

急進可追及忽有報台吉諾爾布已禽阿

逆來獻者玉保遂駐軍待之先以紅旗報捷於策楞策
楞亦卽轉遞至京不知報禽賊者卽賊所遣以緩師也
二月兵至伊犁賊已遁入哈薩克將軍參贊互相咎托
言馬力竭頓師伊犁不進上以諸臣皆非任事才

特命大學士傅恆馳視西師召集諸台吉會盟驅策進
討中途復召還五月褫策楞玉保職以達爾黨阿哈達
哈代之兼命兆惠自巴里坤赴援達爾黨阿出西路擊
敗哈薩克二千賊阿逆易服潛遁我兵追及相隔一谷

僅二三里賊倉卒不及駝載忽有哈薩克人來言卽欲禽獻但需其汗至乞暫緩師待時我師爭欲進捕而達爾黨阿遽下令駐軍不知言欲禽阿逆者又卽阿逆所詭遣也阿逆復徐颺去檄索往還頓兵數月無要領而哈達哈出北路遇阿布賚兵千餘于巴顏山不迎擊聽其颺逸諸從征降夷宰桑見兩將軍見賣無能皆輕之又適有喀爾喀撤臺之事事具前綏服蒙古記于是各降夷亦皆變初去年秋 上封諸降夷台言於熱河

噶爾藏爲綽羅斯特汗沙克都爲和碩特汗巴雅爾爲輝特汗其杜爾伯特本封阿逆及叛後改封車陵爲汗

其餘宰桑等各授官賚幣皆願歸發所部兵從征及見軍屢受欺郵臺內變有輕我心綽羅斯特輝特二部及哈薩克先叛都統和起被誘殲焉阿逆聞四部構亂亦自哈薩克歸會諸賊于博羅搭拉河欲自立爲汗準部復大擾亂策楞玉保逮問亦被害於途將軍達爾黨阿等尋皆被逮定邊右副將軍兆惠以千五百兵駐防伊犁聞變自濟爾噶朗河轉戰而南自十一月啟行戰於鄂壘戰於庫圖齊戰於達勒奇前後殺賊數千二十二

年正月至烏魯木齊諸賊皆會連日數十百戰我兵無不一當百皆步行冰雪淖中履襪不完食瘦駝疲馬且

將盡二十二日至特訥格不復能衝擊乃結營自固時
天大風雪驛傳聲息格不相聞會 上先命侍衛圖

倫楚率巴里坤兵二千問道往迎以三十日至軍圍乃
解兆惠得新兵復往剿巴雅爾部落始回巴里坤

上以準部諸酋甫受封賞歸輒叛知厄魯特人皆不可

德懷三月命定邊左副將軍成衮札布出北路右副將
軍兆惠出西路大剿之會諸部落亦自相吞噬綽羅特
汗爲其兄子噶爾布所篡台吉達瓦旋殺噶爾布厄魯
特向不出痘至是則痘疫盛行死亡相望兆惠兵復長
驅至各烏合賊皆敗走逆酋先後授首惟阿逆未獲六

月兆惠富德等窮追至左哈薩克時哈薩克汗阿布賚已與阿逆積釁且懼招大兵遣使入貢誓禽阿逆以獻適阿逆率二十人往投阿布賚先使人收其馬阿逆驚攜八人徒步夜走俄羅斯界我朝移檄索之是冬報阿逆患痘死移尸近邊命喀爾喀親王侍郎三泰等馳驗以聞於是命成衮札布以定邊左副將軍歸鎮烏里雅蘇臺時察罕度爾大營改設于烏里雅蘇臺而兆惠富德留軍度冬是年迎降之鄂拓克等軍過輒復叛并誘陷都統滿福于是二十二年春命率兵四千再剿漏網之厄魯特時各賊衆聚分四支每支各一二千伺間出沒乃議兆惠由博

羅布爾富德由賽里木分兩翼圍獵約相會於伊犁皆分數路無大隊所至獮薶拔山網谷及明年兩將軍南赴回疆又命親王策布登札布繼之又明年舒赫德阿桂等繼之並歷年剽掠臺站之瑪哈沁與煽亂助逆之刺麻櫛比禽馘無子遺焉計厄魯特四部中惟杜爾伯特部徙科布多以東之拜達里克河以東後始終無二且以兵禽納默庫有功獲保全又達什達瓦之妻當伊犁倣優先率所部叩關來投徙熱河編旗籍又舍楞率所部二千餘竄土爾扈特皆得追誅而和碩特之沙克都汗不從各酋之叛率所部四千人自拔內投巴里坤復

爲都統雅爾沙善襲坑之

上旋鑒其枉于四部中

爲不幸論者謂厄魯特之一大劫則固非無因以然也

初準部有宰桑六十二

宰桑者管事官

新舊鄂拓二十四克爲

其汗之部屬

新舊各十二

昂吉二十一昂吉者分支也乃各台吉所有之戶下

集賽九

專辦供養刺麻事務

共計二十餘萬戶六十餘萬口狹獮其性封

豕其能不作賊者不齒于人數一人能劫數人者爲壯

士能勞苦勇戰鬪各回城及哈薩克一聞其至則闔匿

奔竄虜掠驅載惟所欲相詈者至以厄魯特爲詬厲其

民則爾汗又甚之專假昏媾以吞噬與國昏青海覆青

海皆拉藏戕拉藏昏土爾扈特逐土爾扈特昏都爾伯

特并都爾伯特世濟其凶狠生貔貙生貔致我

一

祖二宗三朝四顧盱食仄席戍塞防秋中國耗弊

仁廟

憲廟屢集廷議皆有此賊不滅天下不安之

諭數窮理極天鍾一阿睦爾撒納以傾覆之王師

初入兵不血刃矢不再發而天不許也王師再入師則

屢次壘則再因而天又不許也幾大幸又幾大不幸一

激再激以致我朝之赫怒

帝怒于上將帥怒于下

合圍掩羣頓天網而大獮之窮奇渾沌檣杙饕餮之羣

天無所訴地無所容自作自受必使無遺育逸種於故

地而後已計數十萬戶中先痘死者十之四繼竄入俄

羅斯哈薩克者十之二卒殲于大兵者十之三除婦孺充賞外至今惟來降受屯之厄魯特若干戶編設佐領昂吉此外數千里間無瓦刺一羶帳毒蓄屢世發於一旦大寧一阿逆之故哉即使阿逆不叛四汗分建亦必不數年一反十數年一反王師旋罷旋興仍同康熙雍正中已事安能者定百年一勞永逸故曰天也軍行所過旁近之國若東部哈薩克若西部哈薩克若左五部布魯特若右十部布魯特皆奔走奉貢睢盱入覲北盡俄羅斯界東盡喀爾喀界西盡布魯特界南盡烏斯藏及青海東西七千餘里南北三千餘里凡闕疆周

二萬里

御製開惑論明不得已用兵之意宣示中

外以準噶爾蕩平上終

兩朝未竟之志祭告

陵廟立碑太學又勒銘伊犁者二勒銘格登山者一前
後天章照耀絕域命禮部侍郎何國宗率西洋人攜儀
器繪地圖徧測西北各部星度節氣日出入早刻列時
憲書頒發命鄂容安劉統勲考漢唐西域輿地今昔治
革緝成圖志其名山川增列祀典者十有六歲時祈禱
班祝文焉于綽羅斯部舊地設總統伊犁等處將軍節
制南北路同參贊大臣駐惠遠城領隊大臣五其一駐
惠寧城又于都爾伯特部舊地設烏魯木齊都統一領

隊副都統一迪化城綠營提督一巴里坤領隊副都統
一古城領隊副都統一庫爾喀拉河領隊大臣一又于
土爾扈特及輝特舊游牧地設塔爾巴哈臺參贊大臣
一領隊大臣二又置迪化州于烏魯木齊設鎮西府于
巴里坤改安西府爲安西州裁安西道凡伊犁所屬城
九烏魯木齊屬城十有六屯堡不與焉皆屬天山北路
嘉慶中伊犁建社稷壇詔伊犁山河春秋致祭仍用乾
隆二十六年所頒祭文朕字改稱 高宗純皇帝廟

號並於伊犁之寶伊局每年仍鑄乾隆通寶錢二成永
以爲例乾隆年間凡兩定準部一定回部兩定金川兩

定廓爾喀一定臺灣及安南緬甸先叛後服總爲十全武功文在嘉慶元年

嗣皇帝恭上

太上皇帝

寶冊

臣源曰漢之西域前稱山北六國後又稱車師六國車師有前後部前王庭則今吐魯番後王庭則今烏魯木齊也其西爲烏孫則今伊犁其北爲北匈奴地則今塔爾巴哈台也皆爲天山北路行國非居國當其阻於風氣間於山川我朝亦嘗勤天下之力以經營之幾與漢世匈奴大宛無異一旦迫天時順人事列亭障置郡縣人又或以爲取之雖不勞而守之或太費抑思兵

果否嘗增耶財果否嘗費耶南北兩路養兵萬有九千
餘名設官千有四百餘員有駐防有換防駐防攜眷之
滿洲索倫蒙古厄魯特兵則移自盛京黑龍江移自張
家口移自熱河其換防番戍之綠營兵則調自陝甘歲
支俸餉銀六十有七萬八千九百餘兩卽內地應領之
額項其增兵者安在

內有新疆本地和稅茶馬疋棉花布可抵銀七萬八千餘兩三

十七年十有一月

高宗斥四川總督文綬開捐之

請諭曰自平定西陲以來酌減沿邊防秋兵馬及酌裁
各省駐防漢軍糧餉馬乾等項除抵補新疆經費外每
年節省銀九十餘萬兩歷今十有餘載歲出較少約積

存千有餘萬是以乾隆初年戶部庫銀止三千三四百
萬今已多至七千八百餘萬有盈無絀是新疆不惟未
嘗糜餉而且節帑其費財者又安在案新疆議略第二
草料及京口杭州等處出旗漢軍俸餉口糧馬乾折色
等項每歲節省銀一百二十九萬餘兩除抵新疆各城
廉俸經費外止餘銀二十一萬且北路屯田二十三萬
一千五百餘兩詳後武事餘記
八千六百餘畝南路四萬九千四百餘畝歲交糧米共
十四萬三千餘石盡支放外尙不敷二萬三千石于舊
存倉貯五十萬石內支補其屯田有兵屯有回屯有民
屯有旗屯開渠疏泉牛給官廩計屯丁十有餘萬移安
西提督于烏魯木齊以轄之自官田外餘地聽民自占

農桑輻輳阡陌成羣賦稅徭役如內地中外一家老死
不見兵革較之康熙雍正間烽火逼近畿邊民寢鋒鏑
中國運饟屯甲于科布多巴里坤且守且戰先後糜帑
七千餘萬者其勞倣又安在且夫一消一息者天之道
衰多益寡者政之經國家提封百萬地不加增而

戶口日盛中國土滿人滿獨新疆地大物賡牛羊麥麩
蔬蔬之賤澆植貿易之利金礦銅礦之旺徭役賦稅之
簡且哈薩克茶馬布緞互市之利又皆什伯內地邊民
服賈牽牛出關至輒闢汗萊長子孫百無一反是天留
未闢之鴻荒以爲盛世消息尾閭者也是聖人損益經

綸之義所必因焉。乘焉者也。夫狃近安忘昔禍。不可謂智。生齒日孳。民財日匱。反欲閉其大源。不可謂智。國用之絀。由名糧武俸之增。河工歲修之費。八旗口糧之重。文銀出洋之甚。皆倍于乾隆中葉以前。不探其本而漫咎于新疆耳。食道聽不可謂智。孟子曰。天下之生久矣。一治一亂。西域之不治。自上古至今。數千載。天欲使化荆棘而康衢。化幽谷而白日。化榛狉而冠裳。化氍毹而閭井。則必得聖人而畀之。且必剷銷磨盪一掃其舊而後畀之。傳曰。文王基之。武王鑿之。周公內之。言其道同。終始相成。臣是以反覆于西陲軍事之本末。覩一支念。

全體觀一隅。歷中國益三歎于始事之固難與終事之不易焉。

附錄

新疆南北路之蕩平也。以伊犁爲總匯重地。而烏魯木齊中外衝要。塔爾巴哈台邊接外藩。分設滿兵駐防。漢兵屯種。皆攜眷移戍。惟南路回疆則更番輪戍。其兵制可考者。伊犁駐防惠遠城滿州兵四千。惠寧城滿州兵二千。有百四十。其伊犁河南岸分駐錫伯兵千。索倫達瑚爾兵千。察哈爾蒙古兵千。有八百。厄魯特兵二千。八百。沙畢納爾兵六

百皆射獵游牧爲業

屯種惟達瑚爾兵其餘皆游牧

又建六城分

駐綠營攜眷兵三千開屯興築星拱棋布與伊犁

城環峙共兵萬有五千三百三十兼歲派換防於

回疆者八百換防於塔爾巴哈台者千有五百

爾塔

巴哈台本有駐防兵九百綠旗駐屯兵六此北路

百後撤去駐防惟存換防及屯兵共二千駐防兵制也其回疆南路則皆換防之兵共五千

七百有六十哈密及哈拉沙各七百葉爾羌及喀

什噶爾各九百阿克哈八百英吉爾沙四百庫車

及和闐各二百餘烏什及賽里木各百五十皆綠旗

兵由內地陝甘及烏魯木齊分年派往惟喀葉二

城騎兵各三百英吉沙騎兵二百由伊犁派往初
議三年一班後改五年一班各設辦事領隊大臣
此南路番戍之兵制也東則烏魯木齊扼南北兩
路之衝設駐防滿州兵三千四百六十以都統轄
之兼轄巴里坤副都統駐防兵千古城副都統駐
防兵千及烏魯木齊總理屯田副都統二員屯田
綠旗兵四千又烏什屯田綠旗兵一千並屬伊犁
將軍節制調遣此東路之兵制也

其烏魯木齊提督則自安西提

標移駐又設巴里坤總兵哈密副將各轄綠營而節制於陝甘總督與新疆駐防相聯絡新疆
駐防換防綠營皆陝甘二省移往其駐防滿州兵

則自熱河西安涼州莊浪移往察哈爾蒙古兵則

自張家口外游牧移往

察哈爾都統兩翼兵額萬人自移往新疆外今惟八

千有奇

索倫錫伯等兵則東三省移往厄魯特沙畢

納爾則由新附編入

沙畢納爾隨土爾扈特來投乃厄魯特之附庸小部或

領以待衛或督以屯官或隸于佐領其回兵則分

隸各城伯克而總轄於將軍大臣惟攜眷駐防之

兵有定額其番戍之兵三年更代以次增設無定

額或謂南路回疆亦宜仿北路駐防興屯之制招

華民實回疆變膏腴爲內地勢尤順利尤大異日

必有措而行之者

乾隆戡定回疆記

乾隆二十有二年伊犁甫定未大定同時復有回部之變回部者天山南路也天山爲蔥嶺正幹袤數千里抵哈密其左右爲準回兩部回部卽漢書城郭三十六國非北路諸行國比南北分路於哈密其由巴里坤踰山或吐魯番踰山經烏魯木齊赴伊犁者爲孔道其由烏什阿克蘇逾冰嶺赴伊犁者爲捷道雪山之陽冬夏湧流數十川貫穿於南路各城而滙於蒲昌海

今呼爲羅布淖爾

爲中國黃河之潛源其間大小回城數十回莊小堡千計漢書西域諸小國及次小國或僅數百戶千餘戶勝

兵或數十人數百人及康熙中

上諭所稱準噶爾

攻取回子千餘城皆並回莊回堡數之也最今昔道里

形勢出敦煌爲古玉門陽關

二關皆今敦煌縣治西南遺趾今遂廢

西行

至哈密爲古伊吾避白龍堆大戈壁之險逕今闢展古

鄯善

亦名樓蘭

而至吐魯番卽車師前部漢戊己校尉所治

唐交河明火州治皆在焉

車師後庭在今烏魯木齊

又西南行逕古

危須焉耆地而至車爾楚軍臺爲漢烏壘城都護治焉

又西至布古爾爲漢輪臺地又西南至庫車爲古龜茲

唐安西都護府治焉又北逕賽里木城拜城

拜城西卽漢姑墨國

而至阿克蘇卽漢溫宿國始分三道一北行至烏什卽

漢尉頭

烏什西北皆布魯特地

一西南行達葉爾羌爲漢莎車乃

南渡玉河而至于闐一則沿烏蘭河岸徑西抵喀什噶

爾卽古疏勒則漢唐以來西域建庭之所此外西北各

小國若循休捐毒盤陀等太氏皆今環回疆之布魯特

各部無君長不比數

至其南諸小國如漢書所稱渠勒精絕戎盧小宛等今並淹沒無踪

意淪入瀚海如曷勞落迦城之比矣大

沙磧周二千餘里流沙遷變今昔不同計回疆東西六

千餘里南北千餘里西南北皆大山界之唐以前皆佛

教其以回回教著者則萌芽于隋唐而盛于元以後其

祖國曰天方更在葱嶺以西數千里有墨德墨克各國

當隋唐之際其國王謨罕慕德者生而神靈盡臣服西

域諸國始掃佛教自立教造經三十篇敬天禮拜持齋

戒葱嶺以西皆尊曰天使

回語稱天使爲別諸拔爾亦曰派罕巴爾

傳二

十有六世曰瑪墨特者當明之末年與其兄弟分適各國始自墨德踰葱嶺東遷喀什噶爾是爲新疆有回首之始仰霍集占兄弟等之高祖也其回部舊汗本元太祖次子哈薩岱之裔世封回部及瑪墨特自西方至各回城靡然從之旋值厄魯特強盛盡執元裔諸汗遷居天山以北回部及哈薩克皆爲其屬哈薩克行國僅納馬而回部各城則分隸諸昂吉徵租稅應徭役并質回教酋于伊犁康熙三十五年噶爾丹敗後其質伊犁之

回酋阿布都實特自拔來投

聖祖優卹之遣人護

至哈密歸諸葉爾羌是爲霍集占兄弟之祖至其子瑪罕木特欲自爲一部不外屬噶爾丹策零復襲執而幽之并羈其二子使率回民數千墾地輸賦長曰布那敦

亦曰博羅尼都

次曰霍集占卽所謂大小和卓木者也乾隆二

十年夏王師定伊犁釋大和卓木以兵送歸葉爾羌使統其舊部而留小和卓木禮之使居伊犁掌回務及阿逆之變伊犁倣優小和卓木率衆助逆以與勤王之台吉宰桑戰踰年王師再定伊犁小和卓遁歸始自疑貳而我將軍等遣侍衛託倫泰往定貢賦未得要約將軍

兆惠復奏遣副都統阿敏圖往招撫初小和卓木之歸也兄弟共議所嚮大和卓木欲集所部聽

天朝指

揮受約束小和卓木以前此助逆自疑阻若聽朝廷處分必召兄弟一人留質京師如準噶爾之例我祖宗世以此受制于人今幸強鄰已滅無偏處者不以此時自立國乃長爲人奴僕非計中國新得準部反側未定兵不能來卽來我守險拒之饋餉不繼可不戰挫也計旣決集其伯克阿渾等自立爲巴圖爾汗傳檄各城愛曼集士馬峙糗糧器械以待回戶數十萬皆靡惟庫車拜城阿克蘇三城之阿奇伯木克鄂對等素悉小和卓忍

驚且懼我兵威皆奔伊犁兆惠乃令鄂對等從伊敏圖率厄魯特兵二千以往以責徵糧草爲名未至庫車中途鄂對等聞親族被俘各城響應且小和卓木心腹阿布都已益兵守庫車請急歸待大軍而後進伊敏圖不從以滿兵百人馳入庫車被害鄂對及厄魯特兵皆馳還事聞上以兆惠方有搜剿厄魯特之役乃

命雅爾哈善爲靖逆將軍二十三年五月將滿漢兵萬餘率鄂對等由吐魯番進攻庫車和卓木兄弟聞之率烏槍兵萬餘由阿克蘇之戈壁捷徑來援六月我領隊大臣愛隆阿等迎擊半途先殲其前隊三千于和托爾

十六日又禽斬千有六百于城外鄂根河奪其大纛截其歸路和卓木兄弟歛餘兵八百入保庫車城我軍方喜二賊酋自投網可聚而殲也鄂對曰賊必不株困圍城勢必遁遁有二道一由城西渭干河涉淺渡一由北山口向阿克蘇戈壁請于兩要隘各伏千兵以待雅爾哈善不爲備終日棋奕亦不巡壘二十四日薄暮有索倫兵聞城中駝鳴似負重遠行之聲潛告將軍將軍復不信是夜兩賊酋及伯克阿布都果以四百騎潛出西門由北山口遁而守西門之副都統順德訥聞報尙以昏夜不發兵及曉始遣百人追之則已渡鄂根河去橋

斷後將軍劾順德訥以塞責并力攻城城依山岡以沙土柳條築成礮攻不入提督馬得勝使綠營兵穴地爲隧道晝夜嚴督不息將及城二丈守城賊瞥見地下鎗光反塹其外面實藁焚之我兵六百餘焦焉復劾提督以塞責皆不自請議處八月守城回目阿布都復夜遁突圍餘衆開門降

上震怒誅雅爾哈善順德訥馬得勝以徇其後并誅參贊哈寧阿時將軍兆惠奉

命來京自請留軍以竣西事 上壯之乃命移師而

南時兩和卓木奔阿克蘇其伯克霍吉斯卽前禽獻達瓦齊受封者也閉城不納給令赴烏什烏什亦不納于

是·小·和·卓·木·奔·葉·爾·羌·大·和·卓·木·奔·喀·什·噶·爾·兆·惠·使
鄂·對·撫·和·闐·而·霍·吉·斯·隨·軍·時·兵·皆·未·集·惟·領·步·騎·四
千·先·行·而·留·副·將·軍·富·德·剿·餘·賊·俟·集·大·軍·繼·進·時·小
和·卓·木·已·堅·壁·清·野·刈·田·禾·歛·民·入·城·使·我·軍·無·可·掠
又·于·近·城·東·北·五·里·掘·濠·築·土·臺·欲·持·久·困·我·而·大·和
卓·木·據·喀·什·噶·爾·相·犄·角·十·月·初·六·日·師·至·葉·爾·羌·陣
于·城·東·兩·翼·兵·先·奪·據·其·臺·賊·東·西·北·三·門·各·出·精·銳
數·百·騎·來·嘗·我·三·戰·三·北·入·城·固·守·不·出·城·大·十·餘·里
四·面·十·二·門·兆·惠·以·兵·少·不·能·攻·城·欲·伺·間·出·奇·先·營
城·東·隔·河·有·水·草·處·結·營·自·固·慈·嶺·北·河·經·喀·城·外·慈

嶺南河經葉爾羌城外土人稱北河爲赤水河南河爲

黑水河此所謂黑水營也

回語稱赤曰烏蘭黑曰哈喇水皆曰烏蘇

兆惠旣

分兵八百使副都統愛隆阿扼喀什噶爾援路又偵知

賊牧羣在城南英奇盤山下謀渡河取之以充軍實十

三日留兵守黑水營而率千餘騎自東而南甫渡四百

騎橋忽斷城中賊出五千騎來截我兵方奮突其陣步

賊萬餘繼之騎賊復張兩翼圍攻我後我隔河軍不能

相救又地沮淤難馳騁且戰且退浮水還營中途爲賊

截隔數隊人自爲戰自旦至暮殺賊千計而馬多陷淖

亦陣亡將士百餘傷者數百兆惠左右衝突馬中槍再

斃再易明瑞亦受傷總兵高天喜等俱戰歿賊復逾河
來攻五晝夜我軍且戰且築壘賊亦築長圍困我十七
夜兆惠遣五卒分路赴阿克蘇告急舒赫德飛章入告
賊於上游決水灌營我師於下游溝而泄之營依樹林
槍礮如雨我師伐樹反得鉛丸數萬以擊賊會布魯特
掠喀什噶爾我軍縱火攻焚賊營賊疑布魯特與我軍
有約大和卓乃使人議和兆惠執其使射書諭以必先
縛獻霍集占方許納款又掘井得水掘窖得粟三月不
困賊駭爲神初

上以兆惠富德兩軍久暴露于外

將士皆勞頓于兩月前卽命靖逆將軍納木札爾叅贊

三格往代。又命增調索倫察哈爾兵赴之。及是兆惠檄
愛隆阿率兵還阿克蘇。催援軍。遇靖逆等以二百餘騎
徑進止之。不可復遇。害富德在北路。聞黑水圍急。卽率
新到之索倫察哈爾兵二千餘及北路兵千餘冒雪赴
援。二十四年正月六日。次呼爾璦。遇賊五千騎。且鬪且
前轉戰。四晝夜。沙磧乏水。齒冰救渴。又乏馬。■半步行。
九日渡葉爾羌河。距黑水軍尙三百里。賊愈衆。不能進。
適巴里坤大臣阿里衮奉命以兵六百解馬二千
駝一千合。愛隆阿之兵千餘夜至。遙望火光十餘里。知
官軍與賊相持處也。又途遇我往刼營之卒。知望援孔。

急卽橫張兩翼大呼馳薄聲塵合沓直壓賊壘與富德軍三路奮蹙賊黑夜不知官兵若干萬自相格殺潰遁我師遂長驅進未至黑水營數十里又擊敗之兆惠見圍賊日少又遙聞槍礮聲塵大起從東來而營中所掘井忽胥知援軍已集卽勒兵潰圍殺賊千餘盡焚其壘賊大敗入城兩軍會合振旅還阿克蘇明年夏四月先遣兵援和闐復二回城之陷于賊者六月兵二萬馬三萬駝一萬皆集阿克蘇又奏以布易回粟省運費三十萬乃兩路進師兆惠由烏什取喀什噶爾富德由和闐取葉爾羌每路兵各萬五千兩和卓自去冬見王師以

四百戰賊數萬繼以三千戰守數月已震聳天威至是遂棄城驅人畜逾葱嶺西遁初兩和卓在伊犁久惟墾種之回數千羈旅相倚及歸而舊部數十萬戶念其先世推戴恐後小和卓木爾庸用其民厚歛淫刑惟以伊犁同歸之回及新投之厄魯特爲親兵故衆解體其出亡也舊部罕從者二酋兄弟欲赴巴達克山其黨欲投敖罕各遣使往而敖罕不報乃赴巴達克山明瑞率前鋒千餘騎追至戰于霍斯庫嶺斬賊五百其地卽葱嶺之巔有黑龍池周數百里回語哈喇淖爾卽釋典所謂阿耨達也七月七日我軍四千餘騎追及阿爾楚山賊

避其輜重婦女以精銳六千伏谷口而羸師誘我入險我軍嚴陣爲備富德以火器健銳營居中明瑞阿桂爲左翼阿里衮巴祿爲右翼別列奇兵援兵各二隊且以兵殿如墻而進奇兵先奪其左右兩山俯瞰下薄賊陣動我兵三面乘之追攻二十餘里戮賊千餘斬其驍將阿布都等獲甲纛兵械無算我師僅傷一卒又三日至伊西洱庫河乃巴達克山界也兩涯皆山曰和什珠克嶺大和卓木先以家屬保河西嶺爲走計小和卓木以萬衆據北山及迤東諸峰決死戰富德先令阿里衮等由南岸趨西嶺而自擊東峰之賊仰攻逾時未克乃選

銃手數十緣山北顧俯擊之而阿里衮軍亦從南岸山上以火器遙擊山北之賊其山麓又狹偏水僅容單騎賊輜重徒屬擁塞我兩軍分扼其走路賊無所遁乃令鄂對霍吉斯樹回纛大呼招降降者蔽山而下聲如奔雷小和卓木手刃之不能止也凡降回衆萬有二千牲畜萬計兩和卓木挈其妻孥舊僕三四百人走巴達克山初小和卓木之擁衆而西也本謀襲據巴達克山之國會以其酋不親迓怒斬其使欲約鄰部擾之於是巴達克山酋興兵拒戰于阿爾渾楚嶺禽其兄弟將軍檄索之函首軍門

是年惟霍集占函首其波羅尼都尸被盜去及二十八年拔達山始獲其尸并

其妻子以獻回部平八月庚午捷奏至京宣示中外兆惠受

圍時已封武毅謀勇一等公至是加賞宗室公品

級鞍轡富德赴援時已封成勇伯至是晉一等侯將士

及各出力回首額敏和卓霍集斯鄂對等錫賚有差立

碑太學凡戰處皆勒銘明年二月王師凱旋駕親

郊勞于良鄉城南三里築壇設纛上親拜天將軍

以下皆甲冑及王公大臣隨行禮畢上御黃幄將

軍等抱膝跪見於是慈嶺以西布魯特愛烏罕博羅爾

散罕安集延巴達克山諸國皆遣使來庭以喀什噶爾

爲叅贊大臣建牙之所節制南路各城各城大者設辦

事大臣駐防大臣小者領隊大臣或二員或一員西四城曰喀什噶爾曰葉爾羌曰英吉沙曰和闐東四城曰烏什曰阿克蘇曰庫車曰闐展其後又以東路哈密土魯番哈喇沙拉三城爲回疆門戶亦設辦事領隊大臣共十有一城各城又有所轄之回城或五六或十餘二十餘不等各設阿奇伯木克理回務自三品至六品各隨年班入覲不得專生殺參贊大臣每歲春西巡邊察回民及布魯特事務秋東巡邊察回民及土爾扈特和碩特耕牧事務以行賞罰其西四城換防之兵由北路及安西路更調阿克蘇設局以葉爾羌紅銅鑄乾隆通

寶錢與回地舊普爾錢並行普爾錢者形橢首銳中無方孔回俗每五十錢謂之一騰格米囊每受四石五斗謂之一帕特瑪當準噶爾時竭澤以漁喀城歲徵糧至四萬八百九十八帕特瑪他稅稱是葉爾羌歲徵匠役戶口棉花紅花緞布金礦銅硝牛羊獐狝羶屬果園蒲桃之稅折錢十萬騰格他城稱是且不時索子女掠牲畜故回民村室皆鱗次櫛比堅墉曲隧以便窖藏防虜劫及兩和卓木歸舊部雖減科則而兵餉徭役煩興供給稍遲家立破及出亡又盡其貲以行民脂殆竭自爲王人後獨苛省斂二十而取一回戶休息更始焉回疆

通外藩者以喀城爲北路葉城爲南路皆西域都會和
闐則西皆叢山東皆戈壁大澤近蒲昌海不通外藩最
僻簡惟產玉聞天下葉爾羌次之皆有玉山玉河定制
春秋采玉二次葉爾羌河舊不產玉自隸版籍漸生玉
石辦事大臣祭河神產玉乃埒和闐其葉爾羌玉山曰
密爾岱山距城四百餘里崇削萬仞山三成上下皆石
惟中成玉極望瑩然人迹所不至也采者乘犂牛迺及
其巖鑿而隕之重或千萬觔以準噶爾鋸截之而使溫
都斯坦玉工治之色黝質青聲清越中宮縣先後貢

重華宮玉磬材特磬編磬各如千事又貢玉冊玉寶

各八十具白微黃者供宗廟白微紅者備慶典任土作貢聲教所漸遂登禮樂四十五年以辦事大臣高樸私役回戶三千盜采官玉事發封禁其山嘉慶四年

詔弛禁常貢外恣民白采是歲葉爾羌獲大玉三青者重萬餘觔葱白者八千餘觔白者三千餘觔邊臣侈其祥以聞上以沙磧輦運勞人急捐罷之至今巋然存哈喇沙

臣源曰乾隆二十五年

詔曰霍集占兄弟負恩肆

逆自取誅夷至其先世君長一方尙無罪過非準噶爾之比所有喀城外舊存和卓等墓仍令回戶管守毋得

樵采污穢以昭國家矜恤之仁考霍集占高祖瑪墨特之初遷喀城也當明之末季距其始祖派罕巴爾已千餘年徒以來自天方回人神明奉之生卽所居爲寺沒卽所墓爲祠其時回疆各城尙皆有汗皆元太祖之裔非回回裔也順治初哈密有巴拜汗葉爾羌有阿布都汗吐魯番有蘇勒檀汗皆以葉爾羌酋爲大宗每表貢皆葉爾羌汗署名康熙二十五年貢表稱臣成吉思汗裔承蘇賚滿汗業其時尙未爲回酋所有逮準噶爾強盛攻破回子千餘城自後無復表貢而乾隆二十年大軍蕩平準部時惟有吐魯番舊頭目莽蘇爾來降此外

無復蒙古遺種

吐魯舊頭目亦已遷居喀喇沙失其故土久矣

然則回城各蒙

古酋汗蓋康熙中準夷滅之非回教逐之準夷既滅元

裔各汗并執回教之長歸伊犁是則霍集占祖宗并未

撫有回疆享一日之威福且派罕巴爾子孫分適各國

喀城和卓特其一支非其嫡裔大宗也彼大小和卓兄

弟又非有功德于回民也王師出之拘幽反之舊部飢

附飽颺報德以怨漢杜欽之論屬賓曰德莫大于有國

子民罪莫大于執殺使者

聖朝潛其宮而封其墓

誅其酋而弔其民風霆雨露帝何私焉巴達克山既獻

和卓木之馘盡有其孥賄餘黨逃入溫都斯坦唆其興

師而攻之鄰部愛烏罕又攻溫都斯坦而滅之於是大和卓木遺孽逃入敖罕道光中復盜西有四城旋燬于天討語具別記若乃勒石昆侖之顛攷磬羣玉之府披牒河源之上七萃卻其驅馳柏梁失其嚴麗奧矣昌矣非下士所得詳矣

乾隆綏服西屬國記

漢書自玉門陽關出西域有兩道南道西踰葱嶺則出大宛康居焉者諸國大率土著有城郭田畜與匈奴烏孫異俗蓋新疆內地以天山爲綱南回北準而外地則以葱嶺爲綱東新疆西屬國屬國中又有二由天山路而西北爲左右哈薩克由天山南路而西南爲左右布魯特雖同一游牧行國而非準非回非蒙古矣逾葱嶺而再西北爲安集延西南爲巴達克山爲愛烏罕雖亦皆回教城郭之國然嶺以西之屬國非嶺以東之郡縣矣方王師戡定準回

已拓版圖周二萬餘里豈尙有意貢譯于聲教不通之區臣妾于葱嶺以西之部而天時人事展轉輻輳若有意若無意不鞭笞而就我銜勒不招致而附我藩墉故阿逆之叛逋爲準部之大不幸而左右哈薩克卽以阿逆之逋而臣貢兩和卓之叛逋爲回疆之大不幸而布魯特及葱嶺以西諸國卽以兩和卓之逋而臣貢蒼蒼者若必舉天山之南北葱嶺之東西居國行國侏儸椎結睢盱之民盡以畀我大清而後已豈前代發轡軒資金幣鑒空招攜所幾其萬一者哉漢世天山以北爲烏孫逐水草諸國天山以南爲城郭三十六國唐

設北庭安西都護開置四鎮白昔風氣判然南北而北路雄強南路每爲之服役要皆各君其國各子其民時絕時通羈縻勿久更何問葱嶺以外欽定西域圖志貫串漢唐以伊犁當烏孫以喀葉二城當疏勒高車諸國至北而哈薩克則昔之康居安集延則昔之大宛南而布魯特則昔之循休捐毒巴達克山則昔之烏秣愛烏罕則昔之大月氏其朝貢獻見或有常期無常期商稅或有定額無定額不悉其遠近強弱夷險向背曷以籌控馭哉

哈薩克分左右三部左部在準噶爾西北右三部在準噶

爾西皆北界俄羅斯東去塔爾巴哈台南去伊犁皆千里其左部曰鄂爾圖玉斯東西千里南北六百里環境皆山西北境曰伊什河地苦寒其汗惟盛夏居之餘時逐水草游牧廣莫蕃茂谷量羊馬風俗物產文字畧同準部而語言稍異乾隆二十年二月準噶爾平阿睦爾撒納叛明年走哈薩克誘煽其汗阿布賚將軍達爾黨阿哈達哈兩路進討阿布賚遣和集博爾根以四千騎從阿逆走魯臘而自率千餘騎西行會于毫阿臘克山下以待七月將軍達爾黨阿兵遇和集前隊二千于雅爾臘山勁騎突其中堅破其伏賊潰斬六百級禽其

渠楚魯克又擊和集後隊二千騎于西路陷陣獲其蘇
礮斬三百級而北路軍亦敗阿布賚于毫沙臘克山下
斬二百級獲其渠帥昭華什三戰三捷遂抵伊什河河
者阿布賚庭帳也乃遣所獲二渠帥歸諭使禽阿逆而
阿逆亦已遠竄明年將軍兆惠富德等復以兵西追深
入阿布賚遣使請罪獻良馬且遣兵鄉導前驅誓禽阿
逆以獻適阿逆先覺遁俄羅斯乃禽獻其黨而和集博
爾根亦率三萬戶款于軍門將軍兆惠啟帳命東向坐
將軍南向坐列筵食之牲體哈薩克回俗必持咒破戒
乃食至是言爲大皇帝臣僕敢泥禁因飽噉引

觀花馬射射鎖子甲皆徹札哈薩克益大駭服於是定互市地于烏魯木齊自後歲時朝貢爲例哈薩克之有三玉斯族猶準部之有四瓦刺族也左部鄂爾圖玉斯已臣其右三部齊齊玉斯烏拉玉斯亦稱中部西部西部亦名塔什干方與中部構兵阿布賚使與我使臣單騎入兩陣間指揮宣檄皆解甲聽命適我參贊大臣富德方追厄魯特逸賊至右部軍于莽格特城外遂詣軍約款其地東南接準部南接布魯特安集延納木干諸部西南踰塔什干西六百餘里地在葱嶺上游有哈喇庫勒卽釋典所謂阿耨達龍池蓋崑崙之巔也其哈沙斯

河錫爾洽河之間岡嶺綿亘北爲騰吉斯大澤尚有北部接俄羅斯境至今未通中國云瀕河兩岸有城五蓋左部游牧逐水草爲古康居在烏孫西北匈奴之西大宛之東故寒暑徙帳卽康居國王冬居樂越慝地夏居蕃內之俗而右部則有城郭與康居五小王所治五城合爲大宛北鄙故或言哈薩克卽大宛云

布魯特分東西部東部五西部十有五東部在天山北準部之西南近葱嶺距伊犁千四百里每部長皆以鄂拓克爲名舊游牧于特穆圖泊左右爲準部所迫西遷
萬安集延王師定伊犁始復故地二十三年六月將軍

兆惠等追厄魯特逸賊至其界遣侍衛往諭其頭目薩雅克部薩拉巴噶什部兩鄂拓克不自王別推一年長者瑪木克呼里主之年九十餘體碩趺坐腹垂至地不能遠行遣使獻牛羊百頭將軍等燕而示之講武咸詫服曰天朝騎射之利嚮雖聞之至于發必命中層甲洞穿馬上三鎗連發五矢左右迭射離馬及地騰上復馳雖厄魯特兵亦不及宜乎東殄準噶爾西服哈薩克何有于我等小部落于是兼撫定霍索楚及啟台兩鄂克六日至其地并上四部共二千餘戶而薩婁鄂拓克亦于七月以所部五千戶來歸東布魯特五部皆

遣使入朝其西十五部則在天山南回部喀什噶爾城
西北三百里道由鄂什踰葱嶺而至其部落每部所轄
或二百餘戶或七百餘戶或千有三百餘戶共二十餘
萬口皆以額德格納部長之

部落雖分而游牧同地猶蒙古之四子部落也

逐水草游牧衣冠風俗皆同東部乾隆二十四年大軍

追逆回徑其地其渠長奉將軍書曰額德格納布魯特

部小臣阿濟畢恭呈如天普覆廣大無外如愛養衆生

素賚滿佛之鴻仁如古伊斯于達里之神威如魯斯坦

天下無敵之大勇

所舉三者皆西域回部先代之賢汗猶中國頌堯舜禹湯也富有

四海

乾隆大皇帝欽命將軍之前謹率所部自布

哈爾以東二十萬人衆盡爲臣僕頭目等以未出痘不敢入中國謹以使入朝京師將軍兆惠表聞于是十五部落亦內附設二品至七品頭目由將軍大臣奏放歲進馬受資減其商稅遣使巡其部落同內地焉布魯特持教同回部而居無城郭游牧同厄魯特而不崇黃教其疆域風俗皆介準回之間人貧而悍輕生重利喜虜掠雖厄魯特強盛時亦不能馴服之東部爲烏孫西鄙古所謂塞王種也西部則南屬葱嶺東連疏勒之休循捐毒也唐時爲大小勃律俗皆不土著無城郭故由鄂什口出葱嶺則諸部落正當其麓

敖罕者葱嶺以西回國也有四城俱當平陸最西爲

敖罕城

亦曰浩罕亦曰霍罕

其渠居之最東曰安集延與布魯

特毗連去喀什噶爾城五百里好賈遠游徧南北二

路從安集延西百有八十里爲瑪爾噶朗城有二萬

餘戶又西八十里爲納木干城萬餘戶

納木干一曰奈曼

又

西八十里爲敖罕城三萬餘戶皆濱那林河岸南揖

葱嶺四城皆有伯克而敖罕城額爾德尼爲之長又

有塔什干等城以三和卓分轄其衆亦附庸于敖罕

故亦稱敖罕八城然塔什干爲哈薩克族實不盡屬

敖罕也其西又有布哈爾國環之世爲勅敵敖罕風

俗畧同南路諸回城而鷲勇倍之乾隆二十有四年
大軍追霍集占霍集占遣使欲投安集延安集延不
報旣而將軍遣侍衛撫定布魯特諸部至其境額爾
德尼酋迓至城內日饋羊酒瓜果餽糧氊毼良馬詢
訪中國疆域物產風俗形勢兵馬器械侍衛廣宣

朝廷威德額爾德尼畏慕奉表并上將軍書稱爲
至威至勇如達賚札木西特之將軍旋貢馬 京

師然亦無所謂汗血者其後霍集占兄弟爲巴達克
山所殲有博羅尼都二子逃赴敖罕故敖罕有回首

遺孽云

博羅尼都一作波羅尼都一作布拉

漢書

敦其長子乾隆中已僭入

京師

稱自疏勒西踰葱嶺則出大宛康居諸國疏勒今喀什噶爾城從其城西踰葱嶺爲出安集延之道安集延諸城土著耕田有城郭廬室而富强善賈善戰亦大宛遺風

巴達克山

亦作拔達克山

葱嶺西南回國也扼葱嶺之右去葉

爾羌千有餘里西北至伊西洱河有城郭負山扼險戶口十餘萬乾隆二十有四年逆回酋霍集占兄弟爲王師所敗西奔巴克達山詭言假道往墨克國謁其教祖而縱兵肆掠其酋素爾坦沙因執博羅尼都而以兵攻圍霍集占於阿爾渾楚嶺霍集占屢敗被禽拘之于柴

札布柴札布者巴達克山繫囚處也時副將軍富德進軍瓦漢城移檄索賊素爾坦沙以逆酋與已同牌罕巴爾之裔欲縛獻恐爲諸部所責旣而霍集占復陰約塔爾巴斯國使攻巴達克山而溫都斯坦國亦興兵謀奪霍集占兄弟大軍又壓境檄索素爾坦沙乃遷霍集占兄弟於密室以二百人圍殪之而馳獻其馘率所部十萬戶及鄰部博羅爾三萬戶俱納款

西域聞見錄稱拔達克山誅霍集占

盡有其帑賄鄰部退木爾沙與師而滅之赦罕又滅退木爾沙考聞見錄作于乾隆四十二年而四裔考官書載至乾隆五十年止尙稱巴達克山職貢不絕并無破滅之事蓋溫都斯坦欲攻巴達克山旣而溫都爲愛烏罕所滅聞見錄傳聞失實歟又以愛烏罕之哈默特沙汗誤爲退木爾沙國故聞見錄無愛烏罕國名凡此錄

于葱嶺以西各國道聽塗說十譌六七不可依據

二十五年遣使入朝貢刀斧

及八駿馬自是職貢不絕漢書皮山國在于閩西西南至烏秬國千有三百餘里今自和闐至巴達克山亦千三百餘里其國治葱嶺南四面皆山河抱城東兩崖有懸度之險唐書謂之竭盤陀國去疏勒西南六百里治葱嶺負徙多河卽古之烏秬今之巴克達山矣

愛烏罕在巴達克山之西亦大同國也有三大城曰喀賓曰堪達哈曰默沙特其喀賓城三面皆山堪達哈城四面依山其汗所都默特沙城舊屬伊蘭部爲愛烏罕所并遂兼治三大城每城相距皆二十餘程地廣數千

里北界布哈爾南界溫都斯坦東界巴達克山勝兵十
有五萬惟火銃刀矛無弓矢重農粟鮮物采商旅罕
至自兼并溫都斯坦後于是金絲之緞工鏤之玉奄豎
傳令聲明文物出諸國上初乾隆廿四年霍集占爲王
師所敗假道巴達克山赴愛烏罕巴達克山中道邀而
殺之愛烏罕及溫都斯坦各興師問罪巴達山汗懼乃
貽中國文綺具言霍集占負中國及擾已國之罪愛烏
罕遂與連和合兵拒溫都斯坦愛烏罕汗亦聞中國之
盛未知其道里遠近遂遣使偕來欲以覘中國廣大二
十七年入貢爲中國同疆最西之屬國于古爲大月氏

境再西爲默克等部卽回教祖國中隔沙漠過此卽海南有思布部落過此亦海皆安息條支境域然其海皆西人所謂地中海非大西洋之海也其克什彌爾之屬爲古蜀賓等國惟通市不貢者不悉言

臣源曰新疆南北二路外夷環峙然其毗鄰錯壤作我屏衛者惟哈薩克布魯特兩部落而已哈薩克三部有汗王公台吉世襲以理其游牧三歲一貢歲一市以馬羊易緞布而稅其百一布魯特亦如之歲遣領隊大臣巡視貪市畏威易於羈馭此外巴達克山距葉爾羌二十五驛愛烏罕距葉爾羌四十驛克什彌爾

距葉爾羌五十一驛溫都斯坦距葉爾羌九十四驛皆
西隔葱嶺無係邊防。雖敖罕部之安集延商賈徧於南北
北諸城貪貿易無他慮。且距葉爾羌亦二十餘驛。敖罕
境狹人稀。外之不及布噶爾什二內之僅當阿克蘇一
隅。其繁庶惟安集延一區不盡爲所屬。見新疆識畧松筠奏回疆事宜
十道光二十二年。敖罕遂爲布噶爾所滅。虜其酋長頭
目。遣使告捷於卡倫。布噶爾者。距葉爾羌四十驛。其地
西北界俄羅斯南界愛烏罕。東界敖罕及布魯特。富強
數千里。統轄數百部。不尙回教。自古聲教兵力所不至。
乾隆以來。惟通市不列朝貢。旣并敖罕。始接邊陲。卽西

域聞見錄所謂塞克國云

此外通市之部見於新疆識

之瓦罕之綽禪之赫斯圖濟距葉爾羌十五站之沙克
拉之什克南之羅善之乾竿特距葉爾羌十八站之達
爾瓦斯之窩什距葉爾羌二十站之博羅爾之巴爾替
距爾羌二十三站之哈普隆之馬爾噶浪之依色克
距葉爾羌二十七站之納木干之塔什罕距葉爾羌
三十站之霍占之科拉普之三十三站之塔爾罕之渾塔
斯之鄂勒推帕三十七站之噶斯尼六十站之坎達哈爾六
站之圖伯特五十站之噶斯尼六十站之坎達哈爾六
十二站之拉虎爾離時通貿易不能自達於天朝
又或卽各大國之附庸部落不足比數至教罕與溫都
斯坦南北相距數千里中隔巴達克山克什彌爾各國
而西域見聞錄謂教罕與溫都昆連與所述控噶爾及
退木爾沙
同
一
荒
謬

乾隆新疆後事記

西域戡定西師亦蕺而與前事波瀾相首尾者北路則有土爾扈特之來歸南路安西路則有烏什昌吉之變亂土爾扈特者故厄魯特四部之一也其游牧地曰雅爾卽塔爾巴哈台在伊犁之北科布多之西南接鄂羅斯其通中國自康熙中之阿玉奇汗始阿玉奇之曾祖和鄂勒於明季國初爲鄰部所逼率其子書岱青等投鄂羅斯其舊游牧之雅爾地則輝特部居之故厄魯特仍爲四部阿玉奇旣長仍回舊部嗣爲汗以女妻策妄策妄則離間其子散札布台吉使率所屬萬五千戶至伊犁盡

沒入之而逐散札布歸鄂羅斯又絕其貢道與赴藏熬茶之路康熙五十二年阿玉奇假道鄂羅斯入貢

聖祖欲悉其要領遣職方郎中圖禮琛由鄂羅斯報之逾三載始反鄂羅斯者北方大國東界黑龍江包蒙古喀爾喀哈薩克直抵大西洋袤二萬餘里土爾扈特自明季國初越哈薩克而往投之俄羅斯城郭國也以土爾扈特故行國亦給以邊地額濟勒河使游牧有騰吉思巨澤曰瑪魯托海在圖理雅部之東俄羅斯之南左哈薩克部之北夾河兩岸廣莫饒水草傳至阿玉奇之孫烏錫巴皆以河南岸爲王庭而居其台吉鄂托克等

于河北休養生息百餘載兩岸各十餘萬戶擅幕駝馬
雲屯谷量乾隆二十二年王師大掃伊犁其各部厄
魯特之逸入鄂羅斯者悉安置于烏錫巴部下是爲新
土爾扈特康熙中俄羅斯之察罕汗曾徵土爾扈特兵
攻西費雅國土爾扈兵不習戰多受創至是叩肯汗攻
圖理雅國復徵之士爾扈特兵屢衄死傷萬計正當王
師定伊犁之後土爾扈特方苦于征役而其族台吉舍
楞者又新叛中國自伊犁竄往投之盛言伊犁空虛可
據狀其四衛拉新投之人同詞附和勸還故土烏錫巴
惑其言與其台吉刺麻集議傳諭大小宰桑各戒嚴約

北岸部落于河冰合時同渡東徙適冬煖河久未凍烏
錫巴不能待遂率南岸十六萬口啟行沿途破鄂羅斯
邊城四鄂羅斯興兵追之已出境將假道哈薩克哈薩
克傾國力戰拒之改道布魯特布魯特千百爲羣環攻
其輜重牲畜如陸網之待獸上爾扈特進退無路不得
已改道各國邊界戈壁之地絕水草旬日皆飲牛馬血
而行人畜死亡大半自十一月至六月始及伊犁卡倫
僅存七萬餘口尫羸無人形伊犁將軍舒赫德嚴兵備
邊遣人迎詰之烏錫巴與其台吉等計議數日始以慕
化歸附爲詞言鄂羅斯持教衣冠俱不同願依中國興

黃教之地以安部衆奏聞廷臣議者以降人中有舍楞
前曾誑害我副都統唐喀祿逃俄羅斯今來歸疑有姦
計且我受鄂羅斯叛藩恐啟釁

高宗以舍楞前竄

時我固再檄索之而鄂羅斯不與是我理直有詞土爾
扈特既背其上國而來儻復干我中國彼將焉往且求
生而致死之不仁急之必鋌而走險不智于是受其降
召其酋長入覲熱河封烏錫巴爲汗其弟親王餘郡王
貝勒公台吉有差分新舊二部各設札薩克給官牧之
馬牛羊十有四萬而新疆市往之十二萬 不與撥
官茶一萬餘封出屯庾米麥四萬餘石而伊犁贍賑之

茶米不與甘肅邊內外購羊裘五萬餘襲布六萬餘匹
棉六萬餘斤。氊廬四百餘架而庫給之。氊棉不與共。靡
帑金二十萬有奇。郵傳供億燕享犒賚使者勞來相望。
一如康熙中撫喀爾喀四部例。降夷息喘如歸。獻西洋
鐘表火鎗及所受明玉印。乃賜哈拉沙地爲其游牧。以
著勒土斯上爲王庭。開都河兩岸廣沃可耕可牧。如其
故地而鄂羅斯方西向。搆兵不暇。東問收其故地。馬行
東西三十日。南北二十日。改建他藩部。仍與我通市。如
初。于是四喀爾喀部與四瓦剌部之衆皆撫而有之。疆
域幾埒元代矣。二十九年而有回疆烏什之變。烏什在

庫車西北千里戶口數萬亦回疆一大都會也準噶爾敗其阿奇木伯克霍吉斯俘達瓦齊以獻受王封及二和卓之亂霍吉斯頗持兩端上恐其反覆不可專

任召入京而以哈密伯克阿布都拉代之阿布都拉暴戾無親其屬役之哈密回子又助其魚肉勒買布糧馬羊壯則攘之而以羸者倍值售之辦事大臣蘇成素憤憤不治事又酗酒宣淫甚至留各伯克妻于署而令兵役裸逐爲樂喜麀怒狼民無所訴二月解送沙棗樹苛派回戶二百四十人相聚謀變一回奔告阿布都拉阿布都拉叱逐之西城回戶不願從亂相率走投駐劄大

臣署亦叱拒不納。是夕亂作。阿布都拉蘇成及兵役皆殲焉。時乾隆二十九年二月也。阿克蘇辦事大臣卞塔

海

一作邊他哈

聞變卽領兵五百赴烏什。烏什開城出迎。卞

塔海卽令舉銃。城復閉。逾二日。又以礮攻城。時城中反者不過四百餘。皆閉戶不預聞。及是則迫脅羣起共聽。阿布都拉號令悉衆馬步二千餘出戰。卞塔海敗走。又敗庫車大臣鄂寶之兵。喀什噶爾參贊大臣納世通伊犁將軍明瑞參贊永貴各以兵赴援。會圍烏什。事聞。卞塔海以誤軍機伏法。納世通亦以騷擾罪誅。官軍晝夜攻城。賊遣其黨潛煽各回城。並乞援于敖罕布魯特。遠

近洵沸會葉爾羌阿奇木伯克鄂對之妻葉依木隨其子鄂斯滿在庫車聞之五晝夜馳至葉爾羌置酒盡召諸阿渾愛曼責以大詣利害復使歌舞之回女勸侑盡醉而陰遣人赴收其兵器又盡縱其馬驅收百里外山澤人心始定其子鄂斯滿自庫車引回兵赴烏什庫車城中羣不逞之徒亦思爲亂伯克阿那雅爾日率衆伯克集大臣署前二更始散阿克蘇回酋色提巴爾才入覲京師至肅州聞警七晝夜馳還阿克蘇城中乃不敢動而賊所遣赴敖罕之巴敦布復爲布魯特執獻于是賊外援絕我兵又斷其樵牧敗其衝突而賊首猶刼

其衆不許出降城南倚山面河自河至城茂林橫翳隔河礮不能及也自五月至七月攻城未克賊一夕忽盡伐之城池豁露我兵四薄賊內潰盡縛首逆以降官兵入城殲其黨羽徙老弱萬餘口戍伊犁烏什平奏善後章程一阿奇木之權宜分一格納坦之私派宜革一回人之差役宜均一都官伯克之補用宜公一伯克等之僕使宜節一賦役之定額宜明一民回之居處宜別一伯克等與官員相見之儀宜定又移參贊大臣于此徙各城回戶以實之越三年而復有昌吉之事昌吉者王師定準部後大興屯田處也設直隸迪化州于烏魯

木齊轄阜康昌吉綏來三縣除兵民回屯外復有內地
謫戍之屯戶是爲流屯乾隆三十有二年屯官以中秋
之夕犒諸流人置酒山坡男女雜坐醉偈流婦使謳諸
流人故悍又皆使酒俄頃激變戕屯官劫軍器據城叛
黎明報至烏魯木齊時班兵散在諸屯城中兵僅百有
五十然皆百戰之餘視賊蔑如也鎮守都統溫福卽率
之以行至洪山口守備劉德叩馬曰此去昌吉九十里
我馳一日至城下是賊以佚待勞且其城非百餘人所
能仰攻破也賊得城必不株守勢必來不如扼險待之
兩崖隱蔽賊莫測我多寡是反客爲主反攻爲守破賊

必矣遂止營賊果至德令于衆曰望其塵氛雖不過千然皆亡命必死之賊幸所乘皆屯馬未經戰陣受創必反走我軍各擎鎗伏以待視旗動而擊之敢先者斬俄而賊鎗競發我軍不動忽前隊一人傷德麾衆鎗齊發賊馬果皆橫逸譟而乘之皆反奔追北至瑪納斯河其地南界天山北瀕葦湖賊趨絕地遂爲官兵所殲其後詔書屢舉二役爲鎮守回疆諸臣之大戒

道光重定回疆記

乾隆二十年蕩平西域分天山以南爲回部回部又分西四城東四城最東三城凡爲城十有一每城各轄回城或五六或十餘不等各設辦事領隊而統于喀什噶爾參贊大臣並受伊犁將軍節制歲征錢糧土貢數十分取一視當日準夷之虐取兩和卓木之騷動勞佚徒倍兼以蘇成激變高樸敗檢之後宗室侍衛騷擾荷校之餘朝廷常慎選邊臣皆保舉之滿員與左遷之大吏三載踐更人知自愛入城回戶休息更生自後保舉漸弛多用侍衛及口外駐防旗員視換防爲利藪以

瓜期爲傳舍與所屬司員章京服食日用無一不取于阿奇木伯克伯克藉供官爲名斂派回戶日增月甚西域赤銅普爾錢一當內地之十喀什噶爾歲斂普爾錢八九千緡葉爾羌歲斂普爾錢萬餘緡和闐歲斂普爾錢四五千緡又土產鹽裘金玉緞布需索稱是皆在常賦之外皆章京伯克分肥而以十之二奉辦事大臣各城大臣不相統屬又距伊犁將軍爲遠恃無稽察威福自由而口外駐防筆帖式情形較熟揆括尤工甚至廣漁回女更番入直奴使獸畜而同民始怨矣屬夷各布魯特久爲近塞藩籬自嘉慶十九年孜牙墩之案枉誅

圖爾第邁莫特其子阿仔霍逃出塞外憤煽種類名圖
報復繼以蘇蘭奇汰列克之事而布魯特亦怨矣張格
爾者故回酋博羅尼都之裔也初回部奉其唐時汗牌
罕巴爾所造經典爲教祖其子孫以貴族世長西域號
和卓木華言聖裔也至二十六世曰瑪墨特始自西域
東遷喀什噶爾其曾孫瑪罕木墨特爲準噶爾所拘有
二子曰博羅尼都曰霍集占號大小和卓木王師
定伊犁釋歸舊部旋叛伏誅其博羅尼都之子薩木克
自特克達山逃匿敖罕有三子次卽張格爾以誦經祈
福傳食部落奸回假餽和卓之名斂財煽衆時有譎言

嘉慶二十五年南路參贊大臣斌靜荒淫失同衆心八月張格爾始糾布魯特數百寇邊有頭目蘇蘭奇入報爲章京綏善叱逐蘇蘭奇憤走出卡附賊領隊大臣色普徵額率兵擊敗之追至霍爾罕莊是夜張格爾僅餘二三十賊舍騎步逃次日官兵追至卡外遣炊尙然接兵不追竟回喀城與斌靜宴中秋節越六日始赴營所禽百餘賊斌靜悉誅以滅口上以斌靜獲賊不訊明黷由蒙隱具奏疑之特命伊犁將軍慶祥往勘得回民所控斌靜縱家奴司員凌辱伯克交通姦利諸罪奏聞礮職逮問道光二年以永芹代之永芹亦未能

撫馭四年秋五年夏張格爾屢糾布魯特數百騷掠近邊且詭降要求叵測時內地回戶多爲其耳目官兵往捕輒遁九月領隊大臣巴彥圖以兵二百出塞四百里擒之不遇卽縱殺游牧之布魯特妻子百餘而還無復行列其酋汰列克恨甚率所部二千助張格爾報復追困官兵于山谷殲焉賊遂猖獗十月詔以慶祥代

永芹參贊以大學士長齡代慶祥爲伊犁將軍時張格爾益造黨與潛煽內地回戶人人思亂慶祥誤任奸回阿布都拉爲腹心陰爲賊耳目不之備也六年夏六月張格爾率安集延布魯特五百餘由開齊山路突至回

城禮拜其先和卓木之墓。同人所謂瑪雜也。距喀城八十餘里。慶祥令協辦大臣舒爾哈善領隊大臣烏凌阿以兵千餘剿之。殺賊四百。賊退入大瑪雜內。墻垣三重。周五里。官兵攻之。突圍出。各同響應。旬日萬計。慶祥盡調各營卡兵還喀城。爲三營。令烏凌阿穆克登布分將之。迎戰渾河。先後歿于陣。官兵隔于賊。不得入城。東走阿克蘇者七百人。此據方略也。詢之軍中人則云。此七百人者。副將周某。四川人。率之築壘。城外同賊圍城。則外兵攻其後。與城中犄角力戰。七晝夜。鎗礮盡死之。未知孰是。但此時四城全叛。此七百人何由得達阿克蘇。若死戰。則副將應初。同疆惟敖罕。優蒙卹典。皆于方略無考。故存疑于此。初。同疆惟敖罕。驚悍善戰。有百回兵。不如一安集延之語。張格爾恐伊

犁北路援兵速集遣使求助于敖罕約四城破子女玉帛共之且割喀城酬勞七月敖罕酋自將安集延萬人至則張格爾已探喀城無援悔背前約敖罕酋怒卽自督所部攻城城不下又恐同人背之腹背受敵率兵宵遁張格爾使人迫陷其衆復歸投者二三千張格爾置爲親兵八月二十日喀城遂陷先是 上聞各路告

急卽 命署陝甘總督楊遇春以欽差大臣統陝甘

兵五千餘馳赴哈密會諸軍進剿以陝西巡撫鄂山署總督又以署陝西巡撫盧坤赴肅州會籌軍餉七月伊犁將軍長齡奏言賊已圍喀什噶爾英吉沙兩城并斷

葉爾羌和闐道路逆酋已踞巢穴全局蠢動喀城距阿克蘇二千里四面回村中多戈壁斷非伊犁烏魯木齊六千援兵所能克復惟有速簡將帥發兵四萬以萬五千分護糧臺以二萬五千進戰

詔授長齡揚威將軍

以將軍德英阿代鎮伊犁又

命山東巡撫武隆

阿率吉林黑龍江勁騎三千出關與楊遇春均爲參贊會阿克蘇進剿原任伊犁將軍大學士松筠請赴回疆招撫又土爾扈特蒙古備兵請赴援

上嘉之皆不

許八月

勅長齡察歷任回疆參贊辦事領隊各臣

貪淫虐激回民之罪斌靜色普徵額均下刑部擬斬監

候巴彥圖濫殺債事追奪卹典章京綬善遣戍黑龍江
前任喀城參贊松福褫職永不敘用 特頒手諭十

條指授方略又詔以乾隆間拓地新疆事皆創始悉用
出征外域之例嘉慶初川陝楚軍需亦未豫定章程致
多糜費今回疆隸版圖者六十餘年城堡臺站悉同內
地不得復以道途險遠爲詞其令總理糧餉大臣畫一
定例繪圖貼說以備奏銷核對且禁廢員幕友從軍濫
邀功賞又以肅州嘉峪關距阿克蘇五千餘里僅于哈
密總設糧臺鞭長莫及其運烏魯木齊所積屯糧赴阿
克蘇並于伊犁采買可省內地轉輸大半其內地軍械

火藥由南路吐魯番至庫車途多戈壁亦改由烏魯木齊北路逾冰嶺轉阿克蘇程途相等而水草較便并開新疆銅山鑄普爾錢又撥烏里雅蘇臺伊犁等孳生牧廠牛駝各數千馬二萬及蒙古汗王公所進駝三千備用時伊犁之川楚客民及流犯內多有曾充鄉勇熟練行陣者較官兵尤勇敢詔選二千從征時賊已陷西四城盡戕兵民燬廨舍浸及渾巴什河距阿克蘇八十里烏什庫車戒嚴阿克蘇辦事大臣長清遣參將王鴻儀領兵六百拒賊于都齊特戰沒賊偏渾巴什河距阿克蘇四十里城中兵不盈千乃復分兵二百扼河拒

之八月葉爾羌回五六千將渡河官兵先搜剿北岸響應之賊時達凌阿自庫車巴哈布自哈拉沙先後來援並分兵援烏什敗其渡河之賊禽斬三百賊復分隊由上游宵渡偏城二十餘里達凌阿等同兵救援長清遣數十騎騁沙揚塵鼓譟東至賊退走南岸我軍亦渡河爲營賊再攻再敗禽斬千百自後不敢窺河北東四城始無恐十月大兵集阿克蘇者萬餘分屯渾巴什河南北時賊三千扼柯爾坪距阿克蘇三百里爲進兵要道山路嶮險中隔戈壁長齡使提督楊芳一鼓破之而和闐伯克伊敏等亦聚衆二千縛獻僞帥及和闐大臣舊

印初回部有白黑二種其白帽爲霍集占支派衆倍于
黑帽各自爲黨張格爾據喀城後虐脅黑回阿克蘇阿
奇木曰伊薩克者遣其黨分赴西四城離間黑回各伯
克故和闐有獻城之役會冬雪封山兵未能進復爲白
回所陷七年春長齡等奏言前奉 詔令大兵分奇

正二路以正兵由中路臺站進而奇兵由烏什草地遶
出喀城以斷其竄遁之路惟是烏什卡倫外直抵巴爾
昌山溝險窄戈壁數百里所經布魯特部落半爲賊煽
未可孤軍深入且官兵甯防阿克蘇四千烏什四千庫
車五百餘并未到之延綏四川兵五千外其進剿之步

騎共止二萬二千如兩路分進相去二十餘站聲息不通且喀城蠶屯醜衆不下數十萬衆煦漂山吹唇沸水非大兵全力西向勢難摧陷必當并歸中路直搗喀城反正爲奇庶可萬全無失長驅破竹擬令武隆阿先統哈朗阿楊芳等官兵萬有一千爲前鋒臣長齡楊遇春次統安福巴哈布達凌阿等官兵萬有六百繼之定期二月六日啟行惟喀城外十七卡倫均接外夷恐賊敗遠遁已潛諭黑回赴喀約衆相機禽截十四日至巴爾楚軍臺喀葉兩城分道處也復畱兵三千以防南路繞襲之賊時張格爾遣賊二萬屯洋阿巴特號五萬是月

二十有二日大兵至大河拐時我軍深入半月未見賊已糧盡日食疲駝羸馬爭望殺賊因糧惟恐賊堅壁清野不戰而困我也是夜始敗其襲營之賊三千次日賊決河灌道多掘溝坎以阻我師我師戈壁中得水以濟士馬午抵洋阿巴特沙漠平曠賊據橫岡五六里長齡楊遇春將中軍武隆阿左楊芳右三路進攻賊據岡下壓者再大兵分路奪岡賊披靡半遁回莊半西竄官軍分路追殲萬餘生禽三千餘斬賊首邁曼愛散等五人盡得牲畜糗糧濟師士氣百倍二十有五日至沙布都爾同城多葦湖樹林賊臨渠橫列衆十萬決水成

沮·淤·騎·難·馳·騁·城·後·林·中·各·有·伏·賊·難·繞·襲·我·軍·乃·先
令·步·卒·冒·險·越·渠·短·兵·鏖·戰·復·麾·騎·兵·繞·左·右·淺·渠·橫
截·入·陣·適·賊·營·火·藥·自·轟·我·軍·乘·之·射·殪·執·旗·賊·帥·一
執·鼓·隊·長·四·衆·始·潰·敗·追·逾·渾·水·河·三·十·餘·里·禽·斬·數
萬·復·分·敗·林·中·伏·賊·及·河·橋·援·應·之·賊·各·數·千·時·河·北
左·山·右·水·路·狹·籌·深·恐·有·伏·乃·議·畱·兵·扼·橋·而·循·河·南
上·二·十·有·七·日·賊·十·餘·萬·據·阿·瓦·巴·特·回·城·依·岡·背·河
官·軍·未·至·五·十·里·見·牛·羊·蔽·野·又·探·騎·數·百·見·軍·卽·反
走·我·師·恐·賊·誘·也·嚴·令·勿·掠·亦·勿·追·距·賊·十·里·而·止·營
夜·遣·吉·林·勁·騎·各·五·百·分·探·左·右·間·道·繞·出·賊·後·次·日

壓賊壘而軍川陝步兵居中騎兵張左右翼進賊佯退
欲誘我兵登岡而反乘之我兵槍礮迭前而藤牌兵虎
衣躍入賊馬驚陣亂岡後伏賊援應死戰而我千騎已
繞出回堡後突擊其背賊大潰追斬二三萬禽二千復
殪安集延僞帥阿瓦邁瑪底二人追至洋達瑪河距喀
城八十里次日整隊至渾河北岸距喀城十餘里賊悉
其衆背城一戰阻河列陣亘二十餘里築橫壘蔽之穴
壘列銃我兵火器反爲土壘所隔賊恃衆氣盛鼓角殷
闐以張聲勢我軍遣死士數百夜擾其營謹囑達旦夜
二鼓西南風起撼木揚沙大霧晦長齡以賊據形勢且

衆寡不敵相偪咫尺恐昏晦乘我四而受敵欲退營十
餘里■遠賊須霽而進楊遇春不可曰天贊我也賊不
辨我兵多少又不虞我卽渡時不可失且客兵利速戰
難持久乃遣索倫千騎繞趨下游牽賊勢而自率大兵
乘晦驟渡上游據上風前鋒先扛礮轟賊礮勢與風
沙勢相并若百十萬兵摧壓驟至賊陣亂比曉我兵盡
渡風止霧霽乘勢衝入賊陣賊土崩同俗高履跼蹙不
良于行且各裹糧餼負戴累重及敗遁橐舄徧地又喀
城大礮尙未運至軍軍衆而無調度不知襲伏犄角之
術惟知并歸一隊故爲我軍所破官兵乘勝抵喀什噶

爾時三月朔也張格爾已先遁官兵先據漢城次破同城僅獲其甥姪及安集延僞帥推立汗薩木汗並從逆伯克等先後殺賊無算生禽四千餘奏聞上以命將出師期殲元惡且屢諭以分遣奇兵截賊去路乃兵臨巢穴縱令免脫棄前功畱後患長齡奪紫疆楊遇春武隆阿奪太子太保少保銜仍刻期獲賊是時武隆阿病留喀城不與兵事三月五日楊遇春率師復英吉沙十六日復葉爾羌又使楊芳以兵六千餘往剿和闐賊黨亦以是日破賊五千于城外禽斬玉努斯遂復和闐初張格爾以重利啗安集延爲羽翼及四城破安集延

不惟盡得府庫官私之財并搜括回戶殆徧張格爾又
昏憤濫誅殺回人大失望亦知前日熏穴求君之失計
也六月 詔楊遇春率凱旋官兵回京以楊芳代爲

參贊時長齡已令楊遇春楊芳率兵八千分路出塞拏
捕諜報張格爾從木吉走拉克沙七月又報走達爾瓦
斯山路嶮險遣兵追跡並諭其部落禽獻楊芳屯阿賴
楊遇春屯色勒庫以待南北相去十餘站阿賴者慈嶺
之脊脊以西水皆西流乃喀城赴浩罕之道也時出塞
官兵八千畱喀城兵九千浩罕布魯特各部落雖各有
禽獻之言賊愈遁愈遠終無要領軍懸絕徼道遠餉艱

而楊芳在阿賴遇浩罕二千餘賊誘官兵入伏鏖戰一晝夜軍幾殆步步爲營嚴陣出險上責諸將孤軍

深入老師糜餉命畱官兵八千防喀城其餘兵九千卽隨楊遇春入關初大軍之西征也密奉手諭以事

平之後西四城可否仿土司分封之例令將軍參贊籌議長齡以張逆未獲奏言愚同崇信和卓猶西番崇信達賴刺麻已成不可移之錮習卽使張逆就擒尙有其兄弟之子在浩罕終出後患勢難以八千畱防之兵制百萬犬羊之衆若分封伯克令其自守則如伊薩克玉素普等助順官兵均非白回所心服之人惟有赦故回

酋博羅尼都之子阿布都里乾隆中羈在京師者令歸
總轄西四城庶可以服內夷制外患武隆阿亦奏言善
後之策畱兵少則不敷戰守畱兵多則難繼度支前此
大兵進剿賊卽有外襲烏什內由和闐直驅阿克蘇之
謀幸克捷迅速奸謀始息臣以爲西四城各塞環偏外
夷處處受敵地不足守人不足臣非如東四城爲中路
必不可少之保障與其靡有用兵餉于無用之地不若
歸并東四城不須西四城兵費之半卽輩若金甌似無
需更守西四城漏卮上切責長齡老悖昏繆欲釋
逆裔歸長舊部與武隆阿均革職畱任九月 命直

隸總督那彥成以欽差大臣赴回疆代長齡籌善後時
張格爾傳食諸部落諸部落漸不能供生計日蹙時中
國購禽獻張格爾者爵郡王金十萬十二月長齡等密
遣黑回出卡縱反間言官兵全徹喀城空虛諸回翹首
以望和卓其白回從賊出卡者家室皆令無恙以離其
心張格爾果復率步騎五百欲乘官兵除歲不備入卡
煽衆潛襲喀城長齡楊芳嚴兵六千以待二十有七日
賊由開齊山舊路潛入阿木古回城白回奔竄黑回要
拒賊知有變卽折奔出卡楊芳率兵三路星夜追至喀
爾鐵蓋山擊斬殆盡張格爾僅餘三十賊棄騎登山副

將胡超都司段永福等禽之八年正月捷聞

詔封

長齡二等威勇公楊芳三等果勇侯均賞戴雙眼花翎阿克蘇貝子伊薩克晉封郡王其餘將士胡超以下賞賚有差是月楊遇春至京實授陝甘總督加恩東四城守禦諸臣贈卹西四城殉節諸臣

恭上

皇太后徽號勒碑太學及喀爾鐵蓋山郊勞受俘舉行如典凡內地剿賊不獻俘惟外夷獻俘故惟康熙雍正乾隆舉行而嘉慶中無之是役用兵三萬六千有奇用帑銀千餘萬兩初恐賊深溝高壘而遣偏師繞出我東路斷餉道也故多畱兵嚴防後路實抵喀城兵不及二

萬其川陝未至之兵有中途返者初張格爾就禽長齡
檄諭浩罕布噶爾縛獻逆裔家屬浩罕遣使來賀言被
虜兵民可以獻出惟同人經典無獻和卓子孫之例而
我喀城叛弁譚祿者先踰城降張格爾後復降浩罕爲
奸細嚮導教其要挾又設伏攻官軍于阿賴旋同浩罕
使至發覺磔死 上以逆孽么麼無關邊患 敕

那彥成楊芳等嚴守卡倫禁其貿易俟夷計窮蹙自將
縛獻求市毋煩檄索旋 召那彥成來京那彥成以
逆子布素普年六歲尙在浩罕及助逆之阿坦台汰列
克等未獲屢遣間購致並招諭布噶爾巴達克山達爾

瓦斯各部落使與浩罕攜貳

上敕那彥成毋貪功

生釁令于九年六月回京于是那彥成先後奏章程數十大略嚴革各城積弊俾各大臣歲終考核于都統參贊又總考核于伊犁將軍互相糾察並增其廉俸許其攜眷定其役使而印房章京俱由京揀派不用駐防以重其選尤嚴賄補伯克之弊定其資格慎其保舉制其迴避其五城叛回地產歸官收租歲糧五萬六千餘石支五城兵餉三萬八千餘石外餘糧萬八千石而喀城之大河沿葉爾羌之亮噶爾新墾尙不在內皆爲酌增各官養廉鹽菜銀之用有餘則變價解阿克蘇采買儲

倉兼改城垣增卡堡練戍兵以漸裁撤此安內之法也至外夷爲逋逃藪者莫如浩罕所屬不過八城安集延卽其八回城之一在浩罕東三百八十里距喀城五百里自閉關罷市後用度不支四面布魯特皆其仇敵一離巢穴卽憂外寇其藏畱逆裔不過以繫白回之心惟嚴禁茶葉大黃出卡以窘其生計盡逐內地流夷以斷其耳目收撫各布魯特以翦其羽翼待其款關求貢而後撫而用之此制外之法也悉允行暨道光九年秋安集延流寓各夷被逐出卡憤怨報復官兵敗績卡外賊衆萬餘攻圍喀什噶爾葉爾羌焚掠回莊那彥成之子

容安以伊犁參贊大臣領兵赴援軍抵阿克蘇畏賊不敢進繞道烏什致賊飽颺出卡逮下獄擬重辟那彥成亦革職長齡以欽差大臣同楊芳哈朗阿馳至軍檄諭浩罕復許入貢通市移喀什噶爾參贊大臣駐葉爾羌道光二十二年赦罕竟滅于布噶爾

臣源曰乾隆二十三年戡定新疆經畫善後之計北路詳于南路故屯田二十八萬餘畝而南路不及五分之一其官兵則北路駐防而南路僅換防商民則北路挈眷而南路不得挈眷夫固畛域視之矣若捐西守東之議固王者不勤遠略然東四城膏腴不及西四城什之

二卽北路伊犁亦不及焉。苟捐畀土酋必互相吞并。自相雄長。易世後且挾其富庶。倔强以與我難。如大小和卓之已事。不然則爲布魯特侵據邊圉。其能晏然已乎。誠使仿伊犁烏魯木齊移眷駐防之例。以同疆戍兵。改爲額兵屯田裕餉。並許內地商民挈家墾種。以漸升科。計喀城葉城以東兩河沿岸原隰膏沃。各數百里有準夷溝渠遺跡。可各得萬餘頃。濶緩渠平決。溉反掌。蒔插輒穫。畝收數鍾。鹵莽爲之事半功倍。不數年兵民愈衍。愈熾。外足以控制回戶。內足以分中國生齒之蕃利。可殫述哉。今同疆各城官吏已許挈眷而戍。卒商民挈眷

之例尙未推廣夫家室不成則生聚不盛人心不固墾闢不富且北路南路皆國家疆以戎索之地何必一輪臺一甌脫上又以南北兩路相輔車而道里迂遠命查冰嶺以西可通烏什之路那彥成德英阿等奏言自伊犁惠遠城至烏什十七站約千二百里俱有水草中隔數河石多水少人馬可行較冰嶺一路稍平惟中有七站屬布魯特游牧未便設驛是以自昔封禁止爲北路換防官兵往來捷徑而兵貴神速設遇緩急卽可由此間道長驅深入皆籌邊者所當攷并附著于篇